

5  
LE COMBAT  
DES VERTVS  
PRESENTE  
A V P A P E  
CLEMENT  
DIXIESME.



A R O M E, 3  
Chez Philippe Marie Mancini. M.DC.LXX.

---

*Avec permission des Superieurs.*







# LE COMBAT DES VERTVS

PRESENTÉ AV PAPE

## CLEMENT DIXIESME.



RES SAINT PERE

*Le monde donne toute son estime,  
Et son affection a vne vertu, qui a  
beaucoup esclatté dans Vostre eslection  
au Pontificat : Cette dignité souue-*

A 2

*raine*

raine ne s'est pas sitost présentée reue-  
 stue de vos six Estoilles, que vous em-  
 ployastes tous les artifices innocents  
 pour vous en deffendre. I'auoie, Tres  
 Sainct Pere, que cette vertu est gran-  
 de, & qu'elle est rare parmy les hom-  
 mes; mais le monde me pardonnera, si  
 j'ay reserué mon estime, & mon affe-  
 ction pour vne autre vertu de Vostre  
 Saincteté, qui est encore plus grande,  
 que la premiere, c'est d'auoir accepté  
 cette dignité souveraine, non pour la  
 gloire qui vous en deuoit reuenir, & a  
 toute vostre noble Famille: mais seu-  
 lement pour euitier les differents, qui  
 eussent pu naistre dans la suite du  
 temps acause de la longueur du Con-  
 claue, & qui vous furent représentés  
 avec tant de prudence pour forcer vo-  
 stre humilité: quand ces intentions pu-  
 res, & desinteressées ne s'y seroient pas  
 ren-

rencontreës, ie ne laisserois pas de persister dans mon sentiment, en ayant une si iuste occasion par les euenements heureux, qui ont suiuy; I'entends cette prudence admirable dans le gouuernement de l'Eglise, la satisfaction qu'en tesmoignent toutes les Couronnes, les acclamations des peuples qui sont tous pleins de zele, & de reuerence pour Vostre Sainteté, la joye qu'ils ont dans le coeur, de ce que vostre vieillesse est priuilegiée, & qu'elle ne se ressent point des infirmitès, qui ont de coustume d'accompagner cet aage: mais pour toutes choses, les voeux qui se font si ardens pour obtenir la grace du Ciel que cette felicitè de l'Eglise soit de durèe. I'ay encore, tres Saint Pere, l'exemple de la Sainte Vierge, qui me confirme dans mon opinion, chacun sçait qu'elle n'a pas reffusè une digni-

tè qui tient de l' infiny ( quoy quelle  
 fust la plus humble entre les Creatures )  
 parce qu'il s'agissoit seulement de mes-  
 nager la paix entre Dieu , & les hom-  
 mes . Des le premier pas qu'elle fit dans  
 la maison de Zacharie sa dignité de  
 Mere de Dieu fut reconnüe ; mais elle  
 ne rejetta point les iustes loüanges qui  
 luy furent donnees par sa Cousine Eli-  
 sabeth . Elle se contenta seulement de  
 pratiquer plusieurs vertus , qui dispu-  
 toient a qui donneroit la victoire a  
 leurs compaignes . Ces vertus nous  
 sont bien figurees par ces douze Estoi-  
 les dont sa teste est couronnée , & que  
 Sainct Iehan dit auoir veu dans son  
 Apocalipse . I'ay creu, tres Sainct Pe-  
 re , que je n'apporterois pas un petit  
 ornement a sa courōne si i'y adjoustois  
 comme ie fais les six de Vostre Sainte-  
 tiè , qui paroissēt aujour d'huy au Ciel de  
 l'Egli-

*l'Eglise, c'est a la faueur de leurs lumieres que se promet le pardon de sa temerité celuy qui estant prosterné a vos pieds ose se dire de Vostre Sainteté*

**Tres Sainct Pere**

*Le tres humble, & tres obeissant  
Seruiteur,*

**Estienne De Fortia;**

*Imprimatur,*

Si videbitur Reuerendissimo Pa-  
tri Magistro Sacri Palatij Apo-  
stolici .

*I. de Ang. Archiep. Vrbini.  
Vicesg.*



*Imprimatur,*

Fr. Hyacinthus Libellus Magister  
Sacri Palatij Apostolici .

**Auant**





## Auant propos .



**C**E n'est pas vne chose ,  
 qui soit fort surprenan-  
 te de voir les vertus cō-  
 battre contre les vices ;  
 cette guerre a commencè des leur  
 naissance , & n'aura point de fin ;  
 l'on ne scait que trop leurs oppo-  
 sitions , & contrarietès , de quelles  
 machines se seruent les vices pour  
 les destruire,quels secours emprun-  
 tent les vertus pour se deffendre :  
 les vertus ont accoustumè de vain-  
 cre , il ne s'en fault pas estonner ,  
 par-

parce que le vice (a proprement parler) n'est que foiblesse ; mais il paroistra sans doute estrange , que i'aye intitulé ce liure le combat des vertus , veu qu'elles sont soeurs & amyes , qu'elles se tiennent toutes par la main a la façon des graces , & qu'elles se prestent des offices mutuels . Pour satisfaire a ce doute , qui peut estre proposé ; Je diray que tous les combats ne se font pas entre les ennemis , il s'en rencontre ausy entre les amys : c'est peutestre ce qui a donné lieu a l'Ange de l'eschole, Saint Thomas de proposer vne question , sçauoir si deux personnes , qui s'entr'ayment , peuvent auoir des sentimens differents ; il respond a cette question en disant , que ce la se peut, la raison qu'il apporte

porte, c'est que l'amour est l'union  
 des volontès, & non pas des opi-  
 nions, par exemple, Saint Paul  
 & Saint Barnabè estoient amys,  
 & ne laisserent pas d'estre opposès  
 dans leurs sentiments, jusques la-  
 qu'ils se separerent, comme il est  
 remarquè dans les actes des Apo-  
 stres, sans que leur amitié pour cela  
 fust offencèe. Voicy vn combat,  
 qui faict plus a mon suiet; c'est  
 celuy de Saint Severe, & de Saint  
 Paulin; ils estoient amys, Saint  
 Paulin disoit a Severe, vous l'em-  
 portès sur moy, car vous vous estes  
 genereusement despoüillé de tous  
 vos biens, mais moy ie les ay en-  
 core, Saint Severe repliquoit a  
 Paulin, l'ay quittè les biens, il est  
 vray, parceque les ayant dans mes  
 mains, ils eussent passè dans mon-  
 coeur,

coeur, mais vous estes bien, plus  
 a louer de ce que les biens sont dās  
 vos mains, & ne passent point dans  
 vostre coeur par l'attachement; le  
 combat que i'annonce n'est pas  
 beaucoup different de celuy dont  
 ie viens de parler: ce qui ma don-  
 nē occasion de l'entrepandre a estē  
 vne pure complaisance que i'ay  
 rendue aux d'ames Religieuses de  
 la visitation, les quelles estant tou-  
 tes deuōēes a ce mīstere, ont sou-  
 haittē vne nouvelle production de  
 ma plume, que i'ay precipitee, pour  
 le iour qui approchoit, & qu'elles  
 m'auoient designē, de leur premie-  
 re habitation en cette Ville, dans  
 la maison qui leur estoit preparee,  
 & comme elles n'ont pu auoir leur  
 domicile sans la permission de no-  
 stre Sainct Pere le Pape, ces dames  
 ont

ont esté aſſès heureuſes , que Clément Dixieſme ait confirmé ce que leur auoit accordé ſon predeceſſeur , & comme elles ſe ſentoient infiniment obligées a ſa Sainteté . Elles m'ont engagé ſenſiblement a luy dedier l'ouurage , que ie leur auois promis , ie n'ay oſé les contredire , quoy que ieuſſe l'imagination rēplie de la Maieſté du Souuerain Pōtife, qui auroit eſté capable de m'en detourner ; i'ay doncques conſacrè par vn acte de mon obeiſſance , a ſa Sainteté les vertus guerrieres , qui diſputent egalement a qui donnera la prefferance a leurs compaignes , toutes ſont vaincūes , & & toutes ſont victorieuſes : ſoyès Iuge de leurs differents, & ne  
regard

regardès point ce combat sans ti-  
rer quelque fruit de  
vostre curio-  
sité .



*Le combat de la Sagesse avec  
l'amour*

**C'** Est avec beaucoup de justice dit l'amour a la sagesse, que je vous deffere la preferance dans le mistere de la Visitation, car Iehan Baptiste estoit esloigné de Dieu, il estoit de son deuoir, qu'il s'approchast de Dieu: mais le moyen dans vn si grand esloignement comme estoit celuy du pechè? c'est vous o Sagesse, qui auès trouuè ce moyen, vous auès faict en sorte, que la Sainte Vierge soit venüe a Elisabeth, le fils de Dieu a Iehan Baptiste. Je ne scay si vous auès obseruè ce qui se passa en la fille de Iephetè, ayant a perceu son pere de retour, elle courut a luy

a luy toute pleine d'allegresse ; tu auois de la joye, dit Hugon Cardinal , de voir ton pere retourner du triomphe , tu pensois trouuer vn pere , tu as recontré vn parricide . Tout le contraire est arriué en la maison de Zacharie , Iesus Christ remporte vn triomphe glorieux sur le Demon , Iehan Baptiste fort des fers, il a de la joye de voir son pere triomphant : mais quoy dirès vous , Iesus Christ estoit enfant ausy bien que luy ; ou est la grauité ? ou est l'autorité ? Je responds avec Sainct Pierre Chrisologue , qu'un Pere est veritablement Pere, lors que l'amour le renduit a se faire enfant, puis que c'est l'amour qui opere : c'est a moy replique la sagesse a l'amour, a vous donner tout l'auantage dans ce mistere .

Pla-



Platon donnant vn coup d'oëil sur le monde s'est escrië , aſſeurement il a eſtè faiët par amour : lors qu'il porte ſa veüe ſur ces deux grands luminaires le Soleil, & la Lune, il redouble ſa voix , aſſeurement le monde a eſtè faiët par amour ; ie fais vne ſuppoſition que ce Philoſophe euſt eſtè eſclairè des lumieres de la foy , quand il auroit conſiderè le fils de Dieu comancer noſtre redemption par l'entremiſe de Marie , il ſe feroit eſcrië , aſſeurement cette redemption ſ'eſt faiëte par amour ; quand il auroit aperceu la Sainte Vierge ſortir de ſa ſolitude pour courre en toute diligence en la maiſon de Zacharie , il ſe feroit eſcrië tout de nouveau , aſſeurement c'eſt l'amour qui luy a preſtè ſes aisles . Lors que Saint

B

Pierre

Pierre estoit sur les eaux, il courut a Iesus Christ, mais quoy, n' apprehendoit il point la mer, qui est si incōstante, & sy terrible a ceux ; qui se mettent a sa mercy, n' apprehendoit il point les vents, qui la pouuoient agiter, ne craignoit il point d'enfoncer dans la proffondeur de ses abismes. Saint Ambroise est admirable sur ce sujet, il dit que Saint Pierre ne s'arestoit pas a regarder ou il mettroit la plante de ses pieds, mais ou il imprimeroit les vestiges de sa charité. La mesme chose se passe en la Sainte Vierge il luy falloit trois iours auant qu'elle pust arriuer dās la maison de Zacharie, elle passe les montaignes de la Iudee ; arretons la je vous supplie, permettes à Vierge Sainte qu'auectout le respect

respect que ie vous doibs , ie vous  
 represente l'incomodité du pelle-  
 rinage, que vous voulès entrepren-  
 dre, les perils qu'il y a a courre .  
 Attendès que ce Soleil que vous  
 portes renfermè dans vostre sein,  
 soit dans son midy , rien n'est ca-  
 pable de l'en empescher , ny les  
 dangers , ny l'incommodité du  
 voyage, non pas mesme sa gros-  
 sesse : en sçauès vous la raison, c'est  
 qu'elle ne s'arestte point ou'elle  
 imprimera les vestiges de ses pieds,  
 mais bien ceux de sa charité . En  
 faisons nous de mesme , ie le sou-  
 haitte , mais i'en doubte fort , car  
 i'apprends de Sainct Pierre Chri-  
 sologue, que quand il s'agist de  
 commettre le mal, il ny a rien qui  
 s'y oppose : voyès moy Eue dans  
 le Paradist terrestre, la voila qui est  
 B 2                      preste

preste de commettre le peché de  
 contreuenir au precepte de Dieu  
 de māger du fruić deffendu: Astres  
 que n'esblouissēs vous les yeux?  
 toutbillons que ny mettēs vous  
 empeschement? ce Pere dit que  
 le Ciel estoit serain, il ny eut pas  
 vne seule creature, qui y mit ob-  
 stacle, c'est que quand il s'agist de  
 commettre le peché, l'on trouue  
 tout facile, le flatteur mesme nous  
 y pousse par ses flatteries; mais est  
 il question d'exercer vne action de  
 charitē, de monter a vn grenier  
 pour secourir vne pauvre famille,  
 l'on trouue tout difficile, l'on se fi-  
 gure des montaignes, ces montai-  
 gnes nous paroissent inaccessibles,  
 si l'on auoit vn peu d'amour les  
 montaignes paroistroient com-  
 me des planures, car l'amour ne  
 recon-

reconnoist point la peine , le seul  
nom de difficulté le faict rougir .

*Le combat de la Iustice avec la misericorde .*

**D**Es le moment que l'homme eut peché, ie demãdois , dit la Iustice, qu'il fust puny, vous eussies bien voulu , o misericorde empescher ce chastiment , il vous deplaisoit asès, que i'auois chassé Adam du Paradis Terestre ; la misericorde replique a la Iustice, Je trouuois en quelque façon ma consolation , en ce que vous ne le punissies pas entieremēt , car vous pouuies punir sur l'heure ses yeux qui auoient regardé le fruiçt defendu , vous pouuies punir ses mains , qui l'auoient destaché vous

pouuies punir la bouche, qui l'auoit  
 goulte ; quand i'entēdis Dieu dans  
 ce moment du pechè de l'homme,  
 appeller Adam , reprique la Iusti-  
 ce , ie iugeay bien que vous l'em-  
 porteriez quelque iour sur moy, ce  
 qui n'estoit point arriué apres le  
 pechè de l'Ange : c'est ce qui a  
 dōné lieu de former vne question ,  
 dou vient que Dieu vsoit de cette  
 misericorde envers l'homme , &  
 qu'il la reffusoit a l'Ange ; la re-  
 sponce que donnent les Theolo-  
 giens a cette question, c'est , disent  
 ils, que le pechè de l'Ange estoit  
 toute malice , en effect si vous fai-  
 ctes vne serieuse refflection sur  
 l'Ange, qu'il estoit vne creature  
 noble, spirituelle , enrichie de tant  
 de dons, & cependant cette creatu-  
 re accablée sous le poids des biens  
 faicts

faictz de Dieū, ait eū l'insolence  
 de s'esleuer contre son Dieu, & de  
 vouloir partager avec luy le plus  
 beau fleuron de sa couronne, au  
 lieu d'estre le premier abaissè de-  
 vant sa grandeur, le premier zelè  
 pour sa gloire, cōme la estè le glo-  
 rieux Sainct Michel. Vous iuge-  
 res bien, qu'il s'estoit rendu indi-  
 gne du pardon; mais dans le pe-  
 ché de l'homme, encore qu'il y  
 eust de la malice elle n'estoit pas a  
 beaucoup pres si enorme; cet hō-  
 me estoit infirme, il estoit misera-  
 ble, la misericorde a pour obiet la  
 misere; retournons a la Iustice, el-  
 le luy veut ceder entierement, &  
 pour vous faire voir l'aduantage,  
 que vous auès sur moy: c'est, dit  
 elle, que vous rencontrès vostre  
 perfection dans le mistere de la.

**Vifitation.** Defcouurons ce fecret  
 auant l'Incarnation, Dieu dans fon  
 throfne pouuoit auoir la miferi-  
 corde quant a fon effect, qui eult  
 eftè en foulageant la mifere,  
 mais non pas quant a la fenfibili-  
 tè par ce qu'il ne pouuoit compa-  
 tir: pour pouuoir compatir il fal-  
 loit qu'il fust homme, il a pris vn  
 corps, & s'eftant incarnè il a ref-  
 fenty les infirmitès de l'homme,  
 & comme Dieu il y apporte le re-  
 mede, de forte que prenant vn  
 corps, fa mifericorde a receu fa  
 derniere perfection; admirès, dit  
 Sainct Auguftin, cette mifericorde  
 de Dieu enuers le genre humain il  
 nous a creès de rien, il nous a don-  
 nè tout ce que nous poffedons; ce-  
 pendant parceque nous auons plus  
 aymè fes dons que l'autheur de fes  
 dons,



dons, plus la creature, que le Createur, nous sommes tombés dans les pieges, que le Demon nous a dressés; la Iustice auoit droit de nous punir, il ny auoit rien, qui la pust satisfaire: le fils de Dieu est venu pour nous soustraire a la Iustice, mais qu'estoit il necessaire, dirès vous, que la Sainte Vierge fust employée a cet effect, c'est qu'elle prestoit son sang pour la formation du corps du fils de Dieu. Voila pourquoy elle est appelée du nom de Mere de misericorde, ce n'est pas que toute nostre suffisance ne vienne de Dieu, mais comme la preuarication auoit esté faicte par vn homme, & vne femme, il estoit cōuenable que ce fust vn homme, & vne femme, qui tirassent l'homme de misere; cet homme est Iesus Christ

Christ, cette femme est la glorieuse Vierge, & comme Iehan Baptiste representoit tout le genre humain, voila pourquoy Iesus & Marie vont conjointement dans la maison de Zacharie; Iesus faict l'office de pere parcequ'il donne, a Iehan Baptiste la vie de la grace, la glorieuse Vierge faict l'office de mere, parce qu'elle s'employe aupres de son fils pour l'entretenir dans la grace qu'il a receüe. La reflection qu'il nous faut faire, c'est de ne pas perdre les sentiments d'enfans en vers Marie, puis qu'elle ne perd point les entrailles de mere, combien y en a'il qui ont contrarieté avec son fils, qui l'ont faict mourir, a'elle cessé pour cela d'estre leur mere? tant s'en faut, elle a conseruè son ardeur, pour ces pecheurs

cheurs quoy qu'elle eust vne haine  
 irrecōciliable contre le pechē. Iob  
 a dit que du sein de Dieu sortoit la  
 glace ; c'est que les pecheurs s'es-  
 loignant de Dieu , qui est leur  
 Soleil, ce Dieu leur faict froid, leurs  
 coeurs sont tous glacēs : mais l'on  
 peut dire que du sein de la glorieu-  
 se Vierge sort le feu, par ce feu l'on  
 doibt entendre celuy qui est des-  
 cendu du Ciel, qui est vn feu qui  
 faict fondre toutes les glaces . Ce  
 feu qui a faict vne incendie d'a-  
 mour dans la maison de Zacharie.



*Le*

*Le combat de la pudeur avec la conjo-  
uissance .*

**L**A pudeur se presente & dit  
que Sainte Elisabeth n'osoit  
se monstrier, qu'elle se deroboit a  
la veüe du monde acause qu'estant  
demeuree long temps sterile, &  
ayant passe le temps de pouuoir  
enfanter elle setrouua enceinte,  
c'est ce qui luy fit naistre la pudeur:  
cette vertu le cede a la vertu de  
conjouissance sans presque liurer  
de combat, si vous en desirès sça-  
uoir la raison. Je vous diray que  
la glorieuse Vierge entrant dans la  
maison de Zacharie fit connoistre  
a Elisabeth sa cousine, la grandeur  
de ce fils d'ont elle estoit enceinte,  
que

que ce fils seroit le precurseur du  
 Messie, & qu'elle estoit venue en  
 partie pour luy tesmoigner la part  
 qu'elle prenoit a sa ioye; Sainte  
 Elifabeth ayant cette lumiere par  
 le transport de joye que fit pa-  
 roistre sur l'heure Iehan Bapti-  
 ste, elle fit gloire d'estre enceinte;  
 & ne feignit plus de se monstrier  
 dans le monde: ie n'ay point de  
 regret dit la pudeur de me voir  
 surmontée, parce que c'est par la  
 vertu de conjouissance, il faisoit  
 beau voir, ces deux aymables cou-  
 sines s'embrasser, & par la joye qui  
 se desbordoit iusques sur leurs vi-  
 sages, l'on pouuoit reconnoistre  
 vne image sur la terre, de ce qui se  
 passe dans le Ciel, vous sçauès, qu'  
 il y a differents degrès de gloire, &  
 que chaque bienheureux goust  
 autant

autant de plaisir de voir son com-  
 pagnon plus esleuè que soy que  
 s'il estoit dās la mesme eslevation ;  
 Casiodore se feroit escrie a ce pro-  
 pos: O douceur de l'amour: en quoy  
 là glorieuse Vierge, & Sainte Eli-  
 sabeth furent bien differentes de  
 ces deux femmes, dont il est faict  
 mention dans l'histoire Romaine,  
 elles estoient toutes deux fort bel-  
 les, & comme l'une auoit de l'ad-  
 uantage sur l'autre, elles deuinrent  
 riualles; pour terminer leur diffe-  
 rent; elles s'auiserent de cet artif-  
 fice: habillons nous avec les plus  
 beaux ornemens que nous pour-  
 rons, celle qui paroistra demain  
 plus belle aux yeux des Romains,  
 c'est celle qui aura la preferance sur  
 sa compagne, le iour arrestè, l'une  
 s'ajuste si bien, que l'or estoit le mo-  
 indre

indre de ses ornements, elle auoit des odeurs en si grande quantité, qu'il sembloit qu'elle les eust faict venir de l'Arabie; mais voicy arriuer l'autre avec vn habit fort modeste, ayant a ses costés les deux enfans de Graccus; elle dist, monstrant ses enfans, voila mes ornements, celuy cy fera l'oracle de son tēps, celuy la liberateur du peuple, & l'emporta sur sa compaigne selon le iugement qu'en donnerent les Romains: ces sorte de contestations ne se rencontrent point entre la Sainte Vierge, & Sainte Elisabeth, la Sainte Vierge pouuoit dire: Je porte dans mon sein celuy qui est le liberateur du Genre humain, celuy qui ne prononcera que des oracles, cependant elle ne tire point vanité de ce qu'elle est supérieure

rieure à sa cousine, de ce qu'elle est la Reine des hommes, & des Anges: Elifabeth ne luy enuie point son priuilege de mere de Dieu, elle se tient trop heureuse de pouuoir estre a ses pieds, & de luy estre beaucoup inferieure . O douceur de l'amour, ie ne m'en estonne plus quand ie lis dans la Sainte Escriture que Zacharie & Elifabeth estoient iustes, & les personnes iustes sçauent mieux que moy que celuy qui enuie perd le bien qu'il n'a pas, & celuy qu'il auroit s'il ne portoit point de ialouzie a son prochain: ce qui me faict souuenir d'un petit mot de Sainct Bernard, vous n'auès pas, dit il, la Virginitè, aymès la dans vne autre, & vous estès Vierge . Sainte Elifabeth void que sa chere cousine est Vierge &



ge & feconde de tout ensemble , & par fa complaifance elle participe a fes perfections. Cette vertu eft d'autant plus recomandable qu'elle eft rare dans le monde, principalement dans les cours, il y aura par exemple quelqu'un qui fera affligé, il faudra s'affliger avec luy, s'il eft ioyeux, fe refiouir avec luy : il me femble dirès vous qu'il ny a pas grande vertu de fe refiouir avec ceux qui fe refiouiffent: ce pendant c'est la grande vertu, car il y en a qui pleurent avec ceux qui fe refiouiffent, ce courtifan qui void un autre esleuè a quelque dignité il s'en fâche il voudroit l'abaisser s'il luy eftoit poffible : aprenons de l'exemple d'Elifabeth a nous refiouir, quand nous voyons quelque accroiffement de fortune en celuy

C

ou

ou nous ne nous doubtiōs pas qu'elle  
deust arriuer: a prenons a detester l'  
enuie, qui est vne pāssion la quelle  
deschire les entrailles .

*Le combat de l'affabilité avec la vertu  
du silence .*

**L'** Affabilité est vne vertu , la  
quelle conuient a toute for-  
te de personnes, dans le monde elle  
est bien seante mesme a celles qui  
passent leur vie dans la solitude ;  
l'on a remarquē que Sainct An-  
thoine l'hermite soit qu'il fust visit-  
tē ou qu'il rendit visitte , n'auoit  
rien de rudē que l'habit, dont il  
estoit couuert ; mais cette vertu est  
particulierement celle que met-  
tent en prattique les Reines . Je  
ne m'estonne donc pas si la Sainte  
Vierge

Vierge qui estoit la Roynedes hō-  
 mes, & des Anges, est si affable, quoy  
 qu'elle eust vne dignité qui luy de-  
 uoit ce sēble faire m'espriser toutes  
 les creatures : mais mon estonne-  
 ment est, quelle va visiter son in-  
 ferieure, & la salüe la premiere; ce  
 la ne se prattique point dans le  
 mōde entre les persōnes esleuēs en  
 dignité; de plus lors qu'une Roy-  
 ne veut faire honneur de visiter vne  
 de ses suiettes, elle enuoye faire ad-  
 uertir au parauant, qu'elle a dessein  
 de venir en sa maison, & d'y faire  
 quelque sejour, affin que la per-  
 sonne ne soit point surprise, & qu'  
 elle se prepare a la bien receuoir,  
 cette Roynemarche avec pompe,  
 & sçait bien garder son rang, & a  
 plusieurs personnes a sa suite; re-  
 tournons maintenant a la visite.

que rend la Sainte Vierge a Sainte Elifabeth . C'est vn Dieu qui va a Iehan Baptiste, c'est la mere d'un Dieu , qui va a Elifabeth . La qualite de ces deux personnes sur passe tout ce qu'on en peut dire , si nous considerons la fin de cette visite, elle ne peut estre plu noble, ny plus esleuee, car c'est pour comãger l'office de la redemption ; mais ou est la pompe ? ou est la comitue ? Anges du Ciel qui antouries son berceau lors qu'elle vint au monde, & vous esprits celestes qui luy tenies compagnie si souuent dans Nazareth ; que ne la conduises vous dans son pellerinage ? ie veux croire qu'ils ne manquerent pas a cet office , neantmoins vous eussies veu marcher la Sainte Vierge a pied tout simplement accompa-

gnee

gnee de quelque Matrone, elle  
 salüe sa cousine qui luy estoit infe-  
 rieure, & la salüe la premiere se-  
 lon la remarque qu'en a faict Sa-  
 inct Ambroise. Pour respondre  
 a cette difficultè, i'ay a dire que  
 ce qui ne se pratique pas dans le  
 monde, s'obserue & se garde dans  
 l'humilité chrestienne: la raison  
 est, que selon la maxime de Sainct  
 Iehan Chrysostome, celle qui est  
 humble repute toutes les autres ses  
 superieures, comme donc la Sain-  
 cte Vierge estoit la plus humble  
 entre les creatures, elle se croit obli-  
 gée de visiter, & de salüer la pre-  
 miere sa cousine, nous laissant vn  
 bel exemple pour en faire de mes-  
 me; cõformement a l'aduis qu'en a  
 donnè l'Apostre Sainct Paul, que  
 les Chrestiens se doiuent preuenir

les vns les autres, & se rendre de  
l'honneur : que vous semble de  
cette affabilité de Marie ? n'a elle  
pas grande part dans le mystere de  
la Visitation, vous n'en doubtés  
pas, apres l'eloge qu'en a faict Sa-  
inct Ambroise ; cependant cette  
vertu le veut ceder a vne autre,  
la quelle luy auoit desia cedé tout  
l'aduantage qu'elle pouuoit esperer,  
c'est la vertu du silence. Sainct Hie-  
rosme parlant de sa grotte en Bet-  
leem dit que l'on ny entēdoit que  
les louanges de Dieu, & vn silence  
Religieux ; la mesme chose se pas-  
se dans la maison de Zacharie,  
l'on ny entend que des cantiques,  
& vn silence, qui vient d'admira-  
tion : cette vertu a paru pareille-  
ment en la Sainte Vierge, lors  
qu'elle gardoit le silence sur sa ma-  
ternité,

ternité , car ce fut le Sainct Esprit qui luy auoit mis le sçeau sur la bouche pour n'en point parler , il est bien vray que depuis le Sainct Esprit fit connoistre a Elisabeth cette dignité , ou'estoit arriuée la Sainte Vierge: l'Abbè Rupert attribüe son silence a sa modestie, elle n'osoit faire paroistre son bonheur de crainte d'exciter de l'admiration . Nous lisons dans la vie de Sainct Ambroise que ce Sainct Euesque faisant vn iour sa visitte avec le zele & la vigilance qui cõuiuent a vn bon pasteur, il entra dans la maison d'vn homme, le quel disoit que la felicitè estoit dās son logis, voyès , disoit il, comme i'ay bien recontrè en ma femme, & faisant venir ses enfans; voyès disoit il , comme ils sont heureux,

cette felicitè estoit fausse comme l'evenement le fit voir: la felicitè veritable se rencontroit dans la maison de Zacharie , tous les voisins & les parents reconoistront cette felicitè, ils prendrōt part a la joye de cette maison ! Mais ne prenez vous point garde que la glorieuse Vierge s'estoit desia retiree en Nazareth ? Le soubscriray toujours a l'opinion de ceux qui ont dit que c'estoit pour ne pas exciter l'admiration au pres de ce grand monde qui estoit venu , parceque c'estoit elle qui auoit apportè la felicitè . O vertu du silence que tu me parois admirable dans le mystere de la visitation, tu me force de me declarer en ta faueur, & de prendre ton party .

*Le*



*Le combat de l'amour de la retraite  
avec celui d'une Sainte  
conuersation.*

**C**Es deux vertus semblent estre opposees, car l'amour de la retraite portoit l'esprit de la glorieuse Vierge iusques dans le Ciel pour y contempler les perfections diuines, & l'amour de la conuersation la faisoit demeurer sur terre pour assister le prochain. La Sainte Vierge sceut joindre tous les deux dans la maison de Zacharie, c'est dans ce sentiment que Saint Gregoire donne cet aduis aux ames parfaites, d'abandonner quelquesfois leur solitude pour venir dans les compagnies, si elles estoient tousiours esleuees dans la  
contem-

contemplation, ie les voudrois cō-  
 parer aux cedres , qui sont sur les  
 montaignes , ils sont beaux , a la  
 verité, mais si vous y prenes garde,  
 ils sont sterils ; il seroit bien plus  
 a propos que ces ames parfaites  
 ressemblassent aux biches qui se  
 courbent & ont la fecondité ; c'est  
 a dire qu'elles doibuent s'accom-  
 moder a l'infirmité humaine, ius-  
 ques a ce qu'elles ayent formé Je-  
 sus Christ dans les cœurs, qui est  
 la fecondité que Sainct Gregoire  
 demande . Il me souuient d'auoir  
 leu dans vn Pere, vne comparai-  
 son qui est plus conforme a la Sainte  
 Vierge , elle est prise des Anges  
 dont il est dit qu' ils estoient de  
 bout , qu'ils voloient , mais s' il  
 s'arestoient de bout , comment se-  
 peut il faire qu'ils prenoient leur  
 effor

effor pour voler? & s'ils voloient en  
 l'air comment entendre qu'ils de-  
 meurassent de bout? cete posture,  
 qui nous les represente de bout  
 marque leur contemplation, ce vol  
 dont il est faict mention, en mes-  
 me temps tesmoigne qu'ils ne lais-  
 soient pas de s'employer pour se-  
 courir le prochain, c'est ce que i'ay  
 dit, qu'il falloit joindre tous les  
 deux, la vie actiue avec la contem-  
 platiue: a l'exemple de la Sainte  
 Vierge, Marthe le veut ceder a  
 Magdeleine dans la maison de Za-  
 charie, cette preferance luy doibt  
 estre bien adjugee, car le fils de  
 Dieu mesme dans le sein de Marie,  
 s'occupoit a la contemplation, ce  
 qui a donne lieu a vne belle demã-  
 de que l'on faict, pourquoy Iehan  
 Bapriste estant enfermè dans le  
 ven-

ventre de sa mere auoit de l'impatience d'en sortir, & que le fils de Dieu, tout au contraire estant dans le sein de sa mere eut souhaitte d'y demeurer tousiours, Iehan Baptiste eut bien voulu forcer la prison, ou'il estoit enfermè, au lieu que le fils de Dieu parlant de sa sortie en parle comme d'une violence, la responce commune c'est que le fils de Dieu experimētoit tant de joye dans le sein de sa mere ou'il contemploit sans cesse, que ce sein luy tenoit lieu d'un Paradis: Magdeleine replique a sa soeur Marthe, il arriuera vn iour que ie l'emporteray sur vous, que vous tesmoigner beaucoup d'empressement, ce n'est pas que i'aye cette opinion: que vostre action doibue estre blasmee, Dieu men garde d'auoir cette

pensée,

pensée, le fils de Dieu ne blaſme-  
 ra point voſtre action, mais il pro-  
 noncera que la mienne eſt plus  
 parfaite ; mais dans le miſtere de  
 la viſitation vous l'emportès ſur  
 moy , en voulès vous vne preuue  
 plus conuainquante que celle cy ;  
 la Sainte Vierge eſt pouſſeè par  
 l'eſprit de Dieu , de quitter la  
 douceur de la contemplation pour  
 venir aſſiſter ſa couſine , Marthe  
 replique a Magdeleine , que dans  
 ces iourneès heureuſes qu'elles ont  
 paſſeès en ſemble elles ne faiſoient  
 que ſ'entretenir du miſtere de la  
 redemption , des moyens què la  
 ſageſſe diuine auoit pris pour exe-  
 cuter vn ſi grand deſſein , la re-  
 flection que ie voudrois que nous  
 fiſſions ſur ce combat, ce ſeroit que  
 nous demandaffions a nous meſme  
 com-

comment nous auons passé les heures, c'est trop peu dire, les journées dans la conuersation, si l'on ne se veut point flatter, l'on trouuera que la mesdisance, & la flatterie, sont les plus doux entretiens l'on se plaist a mesdire; que faict le mesdisant dans les compaignes, il attribüe a vice ce qui est vertu, que faict le flatteur, il iette l'ombre de la vertu sur tous les vices, tout vice se couure du pretexte de la vertu, il en a quelque apparence, la prodigalité par exemple a de la ressemblance avec la liberalité, le flatteur dans la conuersation, s'il void vn homme prodigue, il dira qu'il est liberal, mais comme toute vertu approche du vice, ce la faict que le mesdisant dans la conuersation attribüe a vice ce qui est vertu;

vertu; aprenons de l'exemple de la glorieuse Vierge, & de Sainte Elisabeth les reigles d'une sainte conuersation.

*Le combat de l'humilité avec la magnificence.*

**I**L n'est pas besoin que nous aprenions de la magnificence, que l'humilité l'egalle, c'est trop peu dire, la surpasse dans le mystere de la visitation, mais auant que de monstrier combien a esclatté cette vertu d'humilité, ie propose le doute de Saint Bernard, ie ne vois pas, dit ce Pere, d'as la Sainte Vierge lieu d'exercer l'humiliation, elle n'a jamais commis l'ombre d'un seul peché, elle a esté esleuee a la dignité de mere de Dieu: voulès

vous

vous ſçauoir, dit ce Pere, dou elle tire le fondement de ſon humilité, elle le tire de l'exemple de ſon fils, qui luy ſert de reigle, quand elle penſe qu'il eſt venu pour ſeruir, & non pour eſtre ſeruy, qu'il eſt deſcendu du Sein de ſon Pere, & qu'il n'a point eu d'horreur d'entrer dans le ſien, elle ſe ſent obligée d'entrer dans vn profond abaifſement, d'ailleurs elle conſidere qu'elle doit toute ſa grandeur a l'humilité chreſtienne, cette vertu luy doit eſtre bien chere par cette raiſon : Le bien heureux Laurens Juſtinien a obſeruè que les perſonnes les plus eſleuées dans l'ancien teſtament ſont toutes redeuables a l'humilité qu'ils ont faiçt paroître deuant Dieu, & deuant les hommes, de leur eſleuation; ce qu'il prouue



prouue par l'exemple de Moïse, & de Dauid, cela se peut ausy remarquer dās le nouueau testamēt, car la Sainte Vierge, en se disant la seruante de Dieu, fut esleüe femme, y a il rien de plus grand? le fils de Dieu en se faisant homme est deuenu le sauueur des hommes, y a il rien de plus esleüe? adjouſtons que la Sainte Vierge ſçauoit fort bien qu'elle ne perdrait rien pour s'humilier; c'est son humilité qui fit connoistre sa grandeur, il luy en arriua comme au lis le quel est esleüe sur vn throsne, mais demeurant esleüe il ne monstre pas sa courōne, quand est ce qu'il la descouure? c'est lors qu'il s'abaisse: qui a appris a Sainte Elisabeth que sa chere cousine estoit la Royne des hommes, & des Anges? qu'elle estoit

D

mere

mere de Dieu? ça estè son humilité,  
 qui la jetta dans vn eltonnement.  
 Je le prouue encore par la reigle,  
 des cōtraires, c'est que l'orgueil faict  
 voir la bassesse de l'home; Sainct  
 Dorotheè nous en fournit vn exē-  
 ple bien agreable, il y auoit, dit ce  
 Sainct homme, vn Seigneur d'un  
 Village, qui pour estre Seigneur du  
 Village s'imaginoit estre Seigneur  
 de tout le monde, Sainct Doro-  
 theè luy demanda : n'estès vous  
 point encore fortý de vostre Vila-  
 ge? ouý i'en suis fortý, replique  
 ce Seigneur, quelle estime faisoit  
 on de vous? quelques vns en faiso-  
 iēt alsès d'estime, n'auès vous point  
 estè en Alexandrie? ouý, he bien di-  
 tes moy, quel iugement faisoit on  
 de vous, quelques vns faisoient esti-  
 me de moy, d'autres n'en faisoient

pas

pas grand cas, n'auès vous point  
estè a Constantinople? oüy, estès  
vous entrè dans la cour de l'Em-  
pereur? oüy, il faut que ie vous cō-  
fesse la verité, des l'entree ie ren-  
contray vne foule de valets qui se  
moquerent de moy, & me deman-  
derent qui i'estois, alors ie vis bien  
que ie n'estois pas connu a autrui  
comme ie l'estois a moy mesme.  
Ce Seigneur estoit superbe, & sa  
superbe luy fit connoistre qu'il  
estoit abaissè, car il fut humiliè  
pour sa superbe; aprenons de l'e-  
xemple de la glorieuse Vierge a  
nous tenir dās l'humilité plus nous  
sommès esleuès; faisons tout le  
contraire du pan. C'est la com-  
paraison que donne ce grand Car-  
dinal Pierre Damien, le pan re-  
gardant qu'il a derriere soy vn

manteau Royal qui est la queue, il se glorifie, & à peine de s'humilier a la veüe de ses pieds qui sont difformes, douuient qu'il crie & hurle; comme le propre de l'humilité, est de chercher les occasions de s'abaisser, elle veut ceder la victoire a la vertu de magnificence dans ce mistere, c'est dit elle, que ou se rencontre la vertu de magnificence elle opere de grandes choses. Ne la'on pas veu dans la maison de Zacharie, Iehan Baptiste est sanctifié, il prophetise, il est remply du Saint Esprit, les graces s'estendent plus auant, elles se communiquent a tous ceux de la maison, Saint Elisabeth reçoit la plénitude du Saint Esprit, elle reçoit du soulagement dans ses couches. Zacharie recouure la parole qu'il auoit

auoit perdüe : donnons vn exemple qui nous exprime parfaictement cette vertu de magnificence dans la maison de Zacharie, quand le Nil passe en Egipte, l'on crie, voila le Nil qui passe, cette voix est portee del'vn a l'autre, a mesme temps vous voyez que l'on fatigue, l'on ouure toutes les cisternes pour recueillir l'eau, mais pourquoy tant d'empressement: les Egiptiens vous respondront, c'est par ce que le Nil passe, & qu'il leur faict part de son abondance: la Sainte Vierge auoit la plenitude des graces, cette plenitude estoit deüe, dit Saint Bernard, a sa maternité: ie vois que tous s'empresent dans la maison de Zacharie, l'on court aduertir Elisabeth, que Marie sa cousine, estoit arriuee, elle ressent vne ioye,

D 3                      qui

qui ne se peut exprimer , la  
 magnificence de Marie opere au-  
 sitost de grâdes choses. Je vois bien,  
 dit cette vertu, que vous l'empor-  
 tés sur moy , O vertu d'humilité,  
 parce qu'en toutes les choses que  
 ie fais, la Sainte Vierge  
 prend occasion de s'hu-  
 milier d'avan-  
 tage.



*Le combat de la Modestie avec la Reconnoissance .*

**I**E ne puis cōprendre, dit la modestie, cōment vous voulès que ie l'emporte sur vous, o vertu de Reconnoissance , car i'ay de coutume de choisir les lieux les plus escartès , cependant i'ay esté obligèe de forcer mon inclination qui estoit de me cacher pour paroistre sur les montaignes de la Iudee , c'est en cela, replique la vertu de reconnoissance , que vous me surmontès, parceque vous vous estès surmonteè vous mesme: toutes fois il faut dire que la reconnoissance a le plus esclattè dans le mistere de la visitation , elle a paru premiere-ment en Sainte Elisabeth , les pa-

rolles qu'elle dit en rendent témoignage, d'ou me vient, dit elle, ce bonheur, que la mere de Dieu vienne iusques a moy, ce n'est ny la Saincteté, ny la religion, ny ma noblesse qui me le procurent, il estoit de mon deuoir que i'allasse a vous, en cette haute eslevation de merite, & de dignité, ou ie vous vois : c'est ainsy que la faict parler Eusebe Emisene, mais l'on pourroit former vn beau doubte sur les parolles que Saincte Elisabeth dit a sa cousine, d'ou me vient ce bonheur, elle ne parle que d'elle seule, sans faire mention de la felicité de son fils, il est certain neantmoins que la Saincte Vierge estoit venue principalement pour Iehan Baptiste; ie ne puis mieux donner la solution a ce doubte, que par

vn



vn semblable trait de Sainct Paul, quand cet Apostre parle de la bonté de Dieu, il dit que Iesus Christ est venu pour luy; he quoy n'estoit il pas venu ausy pour les autres? pourquoy cette separation? ce qu'il en faict ce n'est pas par vne complaisance qu'il eut sur luy mesme, mais par gratitude, car il sçauoit bien qu'il estoit venu pour tous; ie commence a comprendre maintenant pourquoy Sainte Elisabeth ne parle que d'elle seulement, c'est qu'elle est impatiente de tesmoigner ses reconnoissances. Cette vertu a paru en la personne de Iehan Baptiste. C'est la coustume des Atheniens de rendre leurs premiers respects au Soleil leuant, comme pour faire voir les obligations infinies qu'ils luy ont de leur bonheur.

heur , n'est ce pas ce que prattique  
 admirablement Iehan Baptiste ,  
 il sentoit les ardeurs de ce Soleil de  
 misericorde, qui estoit dans le sein  
 de la glorieuse Vierge ; ie m'ima-  
 gine qu'il exprimoit sa gratitude  
 a peu pres de cette sorte : Je vous  
 suis infiniment obligè Seigneur  
 de m'auoir preferè a tant d'enfans  
 qui estoient ausy bien que moy  
 dans le ventre de leur mere, d'auoir  
 commencè sur moy par l'entremi-  
 se de Marie l'oeuvre de la Redem-  
 ption , ce n'estoit point que ieusse  
 du merite, car ou c'eust estè le me-  
 ritè pafsè , ou le merite present, ou  
 le merite aduenir, ce n'estoit point  
 le merite pafsè ; car ie n'estois pas  
 plustost conçu que i'estois condā-  
 nè , i'auois contractè comme tous  
 les autres enfans le pechè originel ,  
 ce n'est

ce n'est point pour mon merite present, car vous me venes de tirer de la masse de perdition, ce ne pouuoit estre pour le merite auenir, car vous n'aymès point par esperance, il ny a pour tout que vostre pietè & misericorde; dõt ie vous rends des graces infinies. La reconnoissance a paru encore en la personne de Zacharie, vous sçauès qu'il auoit perdu la voix, mais il ne l'eut pas plustost recouuerte qu'il l'employa aussytost pour louer son Dieu, ce qui estoit vne action de justice, & de gratitude tout ensemble. Mais la vertu de reconnoissance a principalement esclatè en la Sainte Vierge. Vn de ses effects dit Saint Thomas, c'est de ne pas dissimuler le bien faict, c'est icy

icy où la reconnoissance le veut ceder a la modestie, car cette modestie l'obligeoit a se cacher, a ne pas descouvrir qu'elle estoit mere de Dieu, mais cette modestie le cede a la reconnoissance, j'imaginès vous de voir vn fleuve, lequel rencontre vne digue qui s'oppose a son cours, il cherche des ouuertes pour se faire passage, & souffre violence de se voir arrestè: la Sainte Vierge par reconnoissance eust bien voulu descouvrir les graces qu' elle auoit receüe de Dieu; la modestie estoit vne digue que le Saint Esprit auoit mis a ce fleuve, qui resioüissoit toute la maison de Zacharie, le Saint Esprit n'eut pas plustost ostè la digue que la Sainte Vierge entonne son cantique; & la modestie

stie fut bien aise de ceder la victoire a la vertu de reconnoissance dans ce mistere .

*Le combat de la Pietè avec la Vigilance.*

**L**A Pietè paroist admirablement dans la Visitte que la Sainte Vierge a rendüe a sa cousine Elisabeth . C'est pour cela que la vigilance luy veut ceder , elle allegue que cette pietè est plus a estimer que n'a pas esté celle d'Abraham . Vous sçauès que les Anges sortants de sa maison, Abraham leur demanda ou ils alloient , ils luy respondirent qu'ils alloient pour obeir a Dieu qui leur auoit donnè commission de brusler Sodome : remarquès ie vous supplie qu'A-

qu'Abraham auoit dans Sodome, vn cousin, il leur dit, he quoy ne conseruerès vous pas l'homme iuste, pour les fommer doucement a l'espargner, il leur dit que c'estoit vn homme de bien; Abraham tefmoignaen ce rencontre de la pietè pour son cousin, mais celle de la glorieuse Vierge a des charmes plus puissants, car qui luy auroit demandé ou elle alloit au sortir de Nazareth, elle auroit respondu qu'elle alloit ioindre sa cousine Elisabeth, pour sauuer Iehan Baptiste, & en sa personne tout le genre humain, qui fumoit encore de l'anatheme fulminè par la justice de Dieu contre Adam, & toute la posteritè. La pietè s'adresse a la vigilance, & luy represente que c'est a elle qu'est deue legitimement la  
 pref-

prefferance, parce qu'elle a faict la  
 sentinelle pour oster l'empire du  
 peche, c'est ce qu'elle va descou-  
 urir, comment est ce que le pechè  
 a estably son empire? vous m'ad-  
 vouëres que ça estè en mettant l'i-  
 gnorance dans l'esprit, & la foi-  
 bleffe dans la volonté, nous nais-  
 sons tous avec cette foibleffe, & ces  
 tenebres, & il nous en reste encore  
 mesme, apres que le pechè est ef-  
 facè, ce qui marque que le pechè  
 n'a pas perdu tout son Empire,  
 pour destruire cet empire en la  
 personne de Iehan Baptiste, il fal-  
 loit oster l'ignorance, & pour oster  
 l'ignorance il falloit estre Dieu.  
 La Sainte Vierge auoit ce Dieu  
 dans son sein qui dissipoit les tene-  
 bres, dõt Iehan Baptiste estoit cou-  
 uert, il luy auance l'vsage de raison  
 il luy

il luy donne l'esprit de prophetie ;  
 il connoist son Dieu estant encore  
 dans le ventre de sa mere ; l'auries  
 vous connu, o Adam, lors que vous  
 fuyès deuant la face de Dieu ? l'euf-  
 lies vous connu, Moise, en cet estat ?  
 nous lisons dans l'histoire que le  
 Soleil ayant vn iour tourné a l'en-  
 tour du palais de Cyrus : cet Em-  
 pereur prit cela pour vn bon augu-  
 re de sa felicitè future : le Soleil di-  
 uin ne tourne pas seulement vne  
 fois, mais s'areste durât trois mois a  
 respendre des lumieres dans son  
 entendement : voila l'ignorance  
 osteè, mais la foiblesse de Iehan  
 Baptiste fut encore secourüe, sa  
 foiblesse venoit du vieil homme,  
 pour l'oster, il falloit vn homme  
 nouveau . Cet homme nouveau est  
 Iesus Christ, Iehan Baptiste n'agit  
 plus



plus par dependance du vieil homme, i'en ay vne preuue illustre entre les mains, lors qu'il sera en àage on le prendra pour le fils de Dieu, il pourra vsurper la qualité du Messie: Adam vous l'eussies prise puisque vous auiez affecté d'estre semblable a Dieu dans le Paradis Terestre, Iehan Baptiste n'agira point par dependance du vieil homme, voila la foiblesse secourüe, aussy ie ne m'estonne plus si la maison de Zacharie est toute remplie de benedictions. Hugues Cardinal propose vn doubte curieux, il demande pourquoy Dieu aussitost qu'il eut creë le Firmament ne le benit pas, il respond que la cause pour laquelle Dieu ne l'auoit pas beny, c'est qu'en ce mesme iour les Anges auoient esté rebelles. La

E

mai.

maison de Zacharie estoit vn firmament, il y auoit le Soleil, & la Lune, Iesus & Marie, mais Dieu benit cette maison parce qu'il scait rencontrer en la personne de Iehan Baptiste vn Ange qui sera toujours soubmis, qui ne prendra point la qualité de Messie, qui demeurera dans l'estat ou la prouidence la estably: o que cet estat luy est glorieux, puisque c'est celuy de Precurſeur !



*Le*

*Le combat de la Foy , avec la Sainte  
Curiosité .*

**I**L y a vne curiosité qui passe pour vn vice, ausy est elle defendüe, c'est lors que pour iuger de la bonne fortune d'un homme sur terre, l'on a esgard a la conjunction des astres : Manilius voulut sçauoir si son fils auroit vn iour la premiere place dans le Senat , il prit resolution de consulter vn Astrologue, celuy cy ayant obseruè diligemment la cõstellation qui auoit presidè a la naisance de ce fils , & descouurant que cette constellation estoit maligne, cette malignité luy fit iuger qu'il n'auroit point la place dans le Senat qu'il s'estoit promise pour son fils , cette curio-

sité comme i'ay dit est vitieuse .  
 N'y auroit il point moyen de la  
 sanctifier , de la faire passer pour  
 vertu; il est bien facile, ce seroit de  
 consulter ces deux grands Lumi-  
 naires , Iesus & Marie , car de la  
 combinaison de ces deux astres de-  
 pend toute la felicitè de l'homme ,  
 c'est cette sainte curiosité qui a pa-  
 rù merueilleusement dans le mi-  
 stere de la Visitation, ausy la vertu  
 de la foy luy veut ceder la prefe-  
 rance: l'on demãdera sur le suiet de  
 Iehan Baptiste , qu'el pensès vous  
 que sera vn iour cet enfant? Plinè  
 dit que quand vn enfant est arriuè  
 a l'âge de trois ans, on peut juger  
 de ce qu'il doibt estre vn jour, sans  
 attendre que Iehan Baptiste ait cet  
 âge, qu'il quitte les douceurs de la  
 maison paternelle, qu'il se retire,  
 au de-

au desert pour y mener vne vie plus Angelique, qu'humaine, l'on peut tirer iugement des le point de sa naissance, il ne faut que consulter ces deux astres qui ont presidé a cette naissance, c'est a sçauoir Iesus & Marie, car c'est la commune opinion que la Sainte Vierge fut bien aise de tenir entre ses bras Iehan Baptiste, elle estoit venue en partie pour assister Elisabeth dās ses couches, elle ne l'auroit pas abandonnée dans le temps qu'elle auoit besoin de son secours, lors que l'on considera que ces deux astres auoient presidé, il fut facile de iuger que cet enfant seroit grand, l'on est en peine en quoy consistè cette grandeur, pour en donner quelque lumiere, permettès moy de raisonner. Toutes les Creatures ont esté

dans le neant, auant que d'estre dās  
 l'estre, qu'estiès vous il y a cent ans?  
 vous n'estiès rien, or Dieu tira tous  
 les estres du neant, & eut des des-  
 seins pour ces estres, les grands des-  
 seins de Dieu sont ceux qui se rap-  
 portent a luy, pēsès vous pourquoy  
 le premier homme dans le Paradis  
 Terestre estoit si parfaict, estoit ce-  
 luy qu'il fut le premier hōme?  
 nō, car pour estre le premier hom-  
 me, il fut le premier malheureux,  
 & le premier coupable : c'est parce  
 qu'il fut la figure du fils de Dieu, &  
 c'est ce que Tertullien a dit par ces  
 belles parolles, *Christus figurabatur*,  
 ie commence a comprendre que  
 Iehan Baptiste sera grand, ie le  
 iuge par les grands desseins que  
 Dieu a eu sur luy, les grāds desseins  
 sont ceux, comme i'ay dit, qui ont  
 rapport

rapport au fils de Dieu: & quel plus grand rapport que d'estre le pre-  
curseur du Messie ? il en faict des-  
fia l'office dans le ventre de sa me-  
re. Sainct Leon dit, qu'il donnoit  
desia a connoistre que c'estoit l'a-  
gneau qui effaçoit les pechès des  
hommes. Pardonnès moy cette  
digression que i'ay faicte sur la  
grandeur de Iehan Baptiste, ie vois  
que la saincte curiosité veut que  
nous descouvrons vne autre vertu  
en Marie, a la quelle elle donne  
tout l'aduantage dans le mystere  
de la Visitation, cette vertu est la  
foy, car il ne faut pas se figurer qu'  
elle entreprit ce pellerinage sur vn  
doubte, qu'elle eust formé en suite  
des parolles fauorables de l'Ange  
Gabriel, touchant la fecondité de  
Saincte Elisabeth sa cousine, sa foy

fut augmentée, difent les Peres, arriuant dans la maifon de Zacharie, mais auant cette entreueüe elle auoit defia la foy, de ce que Dieu auoit operé en fa coufine, & mefme Sainte Elifabeth fit l'eloge de fa foy, vous eftès difoit elle bienheureufe d'auoir creu. La moralité que l'on peut tirer de ce combat, c'eft depenfer que noftre bonne fortune eft entre nos mains. Il y a cette belle difference entre l'Aftrologie iudiciairie, & celle des Chreftiens, que dans celle la il n'eft pas au pouuoir de l'homme de fe rendre propices les conftellations du Ciel, il en arriue tout au contraire dans l'Aftrologie des Chreftiens, il ne tient qu'a nous, avec l'ayde, & la grace de Dieu de nous rendre fauorables ces deux beaux aftres



astres du firmament Iesus, & Marie, qui font toute la bonne fortune des Saints dans le Ciel, & sur la terre.

*Le combat de la Diligence avec la Patiance.*

**L**A patiance de Sainte Elisabeth fut grande, ie vous l'aduoüe, mais elle ne croit pas auoir tant de part dans le mystere de la Visitation, comme la diligence que fit paroistre la Sainte Vierge, arretons nous premierement a considerer cette vertu dans Marie, voyez vous cette colombe de Noe qui prend son essor pour porter l'oliue de la paix dās la maison de Zacharie, mais i'ay tort de comparer la Sainte Vierge a la colōbe de Noe, parce-

parceque Sainct Iehan Chrisosto-  
 me la reprise, de ce qu'elle ne re-  
 tourna dans l'arche que sur le soir,  
 Noe l'auoit faiët sortir du matin,  
 pour voir si tout estoit a sec, elle  
 s'aresta pendāt le jour a se repaistre  
 sur le lis, tantost sur les plantes, tā-  
 tost sur les arbres, & apres s'estre  
 rassasiée, elle se retira le soir lors  
 qu'il y auoit necessité de se retirer,  
 en quoy, dit Sainct Iehan Chriso-  
 stome, elle eut grand tort, parce-  
 que dans vne nouuelle si importā-  
 te comme estoit d'apprendre si tout  
 estoit a sec, elle deuoit auoir beau-  
 coup plus la diligence; la Sainte  
 Vierge n'eut pas plustost conceu le  
 Verbe dans son sein, qu'elle quitte  
 la douceur de sa solitude & court a  
 grande haste dans la maison de Za-  
 charie, parce qu'il s'agissoit d'une  
 affai-

affaire de la derniere consequence ,  
 qui estoit de porter l'oliue de la  
 paix a Iehan Baptiste , elle auoit  
 appris cette diligence de l'exēple  
 de son fils. Il faut sçauoir que toute  
 la nature humaine estoit aux pieds  
 de la Sainte Vierge, pour attendre  
 son consentement pour le bien-  
 faict de la redemption; l' Ange est  
 enuoyè du Ciel pour le luy demā-  
 der, & la salüant pleine de grace il  
 adjousta, le Seigneur est avec vous, il  
 sembloit que cet Ange se fut ou-  
 bliè de sa commission : que portoit  
 ie vous prie sa commission ? elle  
 portoit que le fils de Dieu viendrait  
 pour sauuer la nature humaine, cet  
 Ange annonce qu'il est desia venu,  
 il est enuoyè pour traiter d'vne  
 affaire, & en parle comme d'vne  
 chose desia faicte . Saint Bernard  
 qui

qui prend la deffiance de l'Ange, dit, qu'il ne se mefprenoit pas, parce qu'il auoit connu que son maistre, qui l'auoit enuoyè, auoit esté plus diligent que luy, ce qui marque l'ardeur que le fils de Marie auoit pour le salut du Genre humain, la Sainte Vierge prit la reigle de la sienne sur celle de Iesus Christ, il y a des Peres qui ont asseuré qu'elle auoit acceleré l'Incarnation du verbe par ses vœux, & ses prieres ar dentes, plus que n'auoient faict les Patriarches, qui l'auoient precedé, par la violence de leur desirs : en passant nous pouuons connoistre combien la Sainte Vierge est prompte a nous donner secours, ce qui nous deburoit biē obliger d'y auoir recours dans nos besoins, elle courut ausy en toute diligence, parce qu'elle

qu'elle renfermoit en soy celuy qui donne les vents aux nauires, le vol aux oiseaux, les aisles aux aigles, & la legeretè aux serfs; ausy est il comparè au serf qui court sur les montaignes, & les collines; entre les animaulx, disent les naturalistes, le serf est le plus agile. Apres tout ce què ie viens de dire de la diligence de Marie, cette vertu a peine de s'attribuer la meilleure part dans le mistere de la Visitation, elle veut que nous estudions la patiãce d'Elisabeth, affin de nous obliger a nous declarer en sa faueur, & prendre son party. Elle fit paroistre cette vertu de patience, lors que sa cousine meditoit son retour en sa maison, ce depart ne luy pouuoit estre que tres sensible. Nous lisons dans la vie de l'Apostre Sainct Paul, qu'a-

qu'ayant presché dans vn lieu avec applaudissement, quand il fut question de prendre congè de l'assemblée, il attira les regrets, & les larmes de tous ceux qui auoient asisté a ses predications; les iourneès que Sainte Elisabeth auoit passee avec la Sainte Vierge estoient les plus belles, qu'elle auoit eu de sa vie, les cieux ne se vantoient plus d'auoir ces beaux astres, le Soleil, & la Lune, ils estoient descendus dans la maison de Zacharie, ne demādès point, je vous prie, a Elisabeth qu'elle vous ouure son coeur, qu'elle vous dise la cause de sa douleur, c'est asses dire que celle qui faisoit toute sa ioye & son bonheur se retire; qui pourroit dire combien sa patience, & sa douleur furent grandes en cette occasion, mais quoy la Sainte Vierge.

Vierge qui est le reffuge des affligés, la laissera elle dans vne detresse si grande, sans la consoler, après luy auoir donnè tant de preuues de son affection, non elle luy faict entendre que cette absence est ordonnée par la dispositiō du Ciel, & qu'encore qu'elle ne soit plus exposée a ses yeux, elle fera tousiours dans son coeur : la charité a cela de propre d'vnir ceux qui sont absents, en telle sorte que si quelqu'un estoit en Orient, & son amy en Occident ils ne laisseroient pas d'estre presents l'un a l'autre, ce qui est arriué, car la Sainte Vierge porta de l'affection toute sa vie a sa cousine Elisabeth, & Sainte Elisabeth n'auoit rien de plus agreable que le souuenir d'un amitié si Sainte, dōt elle mettoit a proffit tous les moments

ments, elle souffre donc pour se conformer aux ordres du Ciel, que sa chere cousine retourne en Nazareth, & comme il arriue que les personnes qui ont long temps regardé le Soleil, croient voir toujours le Soleil; de mesme il sēbloit a Sainte Elifabeth, apres auoir contemplé durant trois mois ces deux beaux astres Iesus & Marie; il luy sembloit disie les auoir encore deuant ses yeux. Le combat est finy, La vertu de Patiance le veut ceder a la diligence. Aprenons d'Elifabeth a souffrir patiamment l'absence de Iesus & Marie: cette absence est souuent ordōnée pour nous faire desirer avec plus d'ardeur leur presence, ou pour nous faire exercer la vertu de Patiāce, laquelle nous peut conduire a la perfection.

F I N

